

栗香隨筆

序

暨陽非壯縣也然實爲三江之所會歸故其源遠流  
長氣王百谷生其地者清靈神雋代有傳人世家喬  
木雖林立遺芳而高門鉅鑲焜耀一鄉者首崇金氏  
以鴻詞顯以理學傳以勲名著歆向傳經錯鈗解字  
各彰家法用表厥貽近自州郡遠至淮南河北及夫  
京輦名流六堂觀國之彥亦莫不謂緝王氏青箱之  
學編廖家世綵之篇咸同以來端推淮生同轉爲亢

宗云猗歟盛哉抑何其所託之高而傳之遠也君旣  
憲章舊德祖述清芬樹幟騷壇著爲隨筆登高作賦  
能說山川仿主客圖系本事詩吹噓寒畯磁引後生  
以爲己任引李穆堂侍郎所云凡拾人遺篇斷句代  
存之者比諸掩骼乳嬰功德尤鉅噫此宰相之量而  
良史之度也向當乾嘉全盛之時提唱宗工主持風  
雅安見王徐畢阮專美於前也哉事更百年世經三  
嬗運際中興靈臺偃伯大啟學流聿新文教自四行

省刊經史外躋是則鯁穴傳書龍威獻秘納甲飛伏  
測圖演段之巧祔彌精飛車螺舟輶彈鬚鬚之奇衰  
日出談天則梯窺月竈步地則柱表寒門因提光景  
守之以器雜採水火閉之於房譯史旣詳審圖具碣  
譬嘗閱市借瓶非若鄒衍虛詞張騫鑿空竊欲挈其  
要領稽其制度分雜誌雜傳雜攷雜錄都爲一編師  
丹善忘逡巡未就君旣擅有張茂先之博綜劉原父  
之淹貫曷不紬金鎖石室之藏擴三島十洲之紀用

備

國家控馭百蠻吞吐大瀛之佐證資成皇覽副在名山於以見近揮季子碑之榮光遠陋吾妻鏡之俚史豈曰小補之哉先生亦有意乎則董而理之矣光緒九年癸未冬十二月祥符周星警涑人甫拜撰

序

出江陰城西廿里地曰申港吾宗聚族而處焉爲楚  
春申之采邑有吳季子之大家名以事繫見諸韓滉  
之傳地因人重載於葛叟之文桑梓遺型宛然心目  
再西爲大岸則金氏居之顧陸生連里閭朱陳代成  
因好守望相助欣戚與同荃孫穉歲卽罹寇難流離  
轉徙卅載於茲聆鄉語而茫然詢土風而莫辨嘗侍  
家君談讌爲徵往事數舊姻習俗之樸茂品行之醇

摯謹識於懷弗敢忘也歲己卯金淮生表兄自粵東  
轉餉相遇於都門握手問訊歡若素識振衣千仞抱  
此春陽淬鋒十年鬱爲宵練間示近作兼權新義靈  
發自解天倪獨闢濯瑤蕤於秋泓激涼吹於空碧同  
時華士罕有其儔文字之契丹雞可盟官檄頻催驪  
駒就道睇山川而間隔通箋札而交勉又約哀集邑  
中先輩著述廣爲流傳脈脈兩心迢迢千里今秋寄  
卧栗香隨筆及三筆若干卷蓋淮生新著也簿書期

會之地補綴縑緗關河行役之餘網羅風雅追述舊  
德奉揚清芬舉粉榆之嘉話矜式後賢敘山水之昔  
游徘徊陳跡酒人已散黃壚之感旋生游子重來白  
社之詩尙在割錦千匹餐花萬株安石碎金稚川宏  
藻自序有云爲感舊懷人之助多抱遺訂墜之資三  
復斯言畧窺宗旨又因官事四至粵西駕江鴻雪描  
成著色之圖矜峽雞潮聽慣相思之調荒山水井洗  
碧甃而摹銘廢院銅鐘剜蒼蘚而認字至於陽侯肆



虐矜澤雁之哀吟天吳不朝紀水犀之禦侮羈愁騷  
屑往興來情則又夢溪筆談同茲典博桐陰舊話無  
此關係者矣而荃孫更有感者淮生於去夏迎

晴初表丈至梧荃孫亦於辛巳秋迎 家君遠來京

邸淮生碩學雄才名流推重方補桓寬之論載賡東  
哲之詩就養無方說親有道荃孫則萬里浪游囊金  
未蓄十年冷署炊玉徒嗟乞米之帖不靈避債之臺  
已築其賢不肖相去可以道里計哉但願他日者偕

隱青門歸耕綠野放棹三山之港敲詩六射之臺摘  
蘆墅之蔭以爲羞擘繖墩之梅以爲菹扶婆娑之二  
老同話斜陽挈嬖媿之諸嬰共斟良醞絮萍蹤於夜  
半如夢如塵趁花事於春初且耕且讀先喆之書高  
可盈尺容齋之筆續不止五其爲至樂曷其有極人  
之所欲天必從之請以此日之片言聊當他年之息  
壤可乎光緒丙戌季秋繆荃孫序於都門

# 序

江陰金君湛生初纂粟香隨筆八卷已刻行矣既復  
三續其書又各八卷舉以示琰督爲之序君之與琰  
雖升潛殊迹而真奇夙契辱徵鄙製誼不可辭爰迺  
披覽始終闕尋愔趣究其體要有四善焉靈運之徵  
祖德安仁之紀門風數典不忘誦芬無斁袁宗世範  
曾氏庭聞衍繹義方聿闡之推之訓君之尊人時方就養  
陳先懿永傳范喬之硯是曰述德其善一也宦學異

鄉睠懷故里念松楸而懸跂詠桑梓之必恭髫鬢之  
所釣遊戚郇之所還往陳留風俗追溯其盛時襄陽  
耆舊或傳其軼事是曰敬鄉其善二也影纓海隅沿  
牒領嶠覽郡邑之據衝審山川之紆險夷吾五施之  
土辨厥物宜裴秀六體之圖明其阨塞舉凡劉伯錄  
異去非代畚休符之記風土成大之志虞衡莫不營  
萃今編茹涵眾製皆足助興除於從政資攷鏡於異  
時是曰經務其善三也若夫名宿篇題朋遊文藝相

如封禪之橐長吉奚囊之詩備用摻羅悉加甄敘林  
膏五夜不辭掌錄之勞殘錦三尺故是心靈所寄千  
秋攸託不泯聲塵九原有知亦當感涕是日闌幽其  
善四也夫子家之書丙部所錄古昔作者大都斐然  
而輒近以來脞說讐言街談巷議紛糅蚩蚩時亦有  
焉君之此書用力旣勤擇言尤雅弗假輦輓浮譌之  
飾不蹈米鹽凌雜之譏可謂粲乎可觀繁而不厭者  
已在昔明清篋錄衍其餘話公謹雜志極於別集率

皆書經四續文彙一編而君才尙有餘勇猶可賈輶  
軒可問揚子雲之用心市肆閱書王仲任之誦憶繼  
自今更勤香輯益轅媿富夷堅支志癸記增其卷裘  
成式雜俎酉陽彰其沈博於以綜合曩作蔚爲鉅觀  
琬雖頽然老乎猶將盡讀之而更序之也

光緒丁亥仲春望日越人汪琰譔

粟香隨筆自序

四庫書提要云古來小說之體大抵瑣屑猥雜作者弗尙也余風塵奔走二十餘年學殖荒落而遺聞軼事與夫名篇雋句亦往往久而忘之歲辛巳需次羊城寓訶林之前風雨驚秋累日不出追維所聞所見信手編輯無所謂體例也不標題不分類詩詞較多爲抱遺訂墜之資亦感舊懷人之助境有所觸心有所好雖習聞習見並羈入焉瑣屑猥雜之譏固所不

暇計矣光緒七年季秋江陰金武祥澐生甫識



栗香隨筆題詞

山陽秦 煥文伯

一編金粟散天香  
片玉遺珠入錦囊  
雄匹馬班垂著作  
狂啍狐鬼托文章  
樓成儼欲凌千仞  
輶採無難遍八荒  
問字名山他日事  
結鄰我幸近江鄉

南城劉 彝子壽

斷句零星比碎金  
頻年仰屋費搜尋  
一編白社高賢傳  
十載黃墟感舊心  
地下故人應掩淚  
天涯詞客總

知音遯齋閒話容齋筆韻事從教屬藝林

巨手真堪造鳳樓羣材都向箇中收文章雜組侯鯖  
錄風雅扶輪班馬儔曠世奇聞搜海國殊方異物紀  
炎州徵文豈爲資談助開卷猶能作卧游

歙縣潘貞敏伯時

栗香居士好著書小說九百卑虞初風騷經術恣蒐  
討邱索墳典供畋漁名山一席有位置容齋五筆斯  
權輿巴人下里蒙採摭是以燕石儕璠璣

卷中選錄拙作故云

定遠凌兆熊仲璫

胸有燕公記事珠琴成百衲腋千狐說經曾屈長頭  
賈論史還逾禿鬢蘇餘技十人分足了及身千古定  
非誣輶譚我亦編蠹映三舍真應避小巫

拙箸蚊映  
叢談未就

停雲八表念朋簪風雨中宵感不禁手撫江湖耆舊  
集情兼騷雅美人心山經海志搜奇富書雋言鯖託  
旨深更繼容齋成五筆藝林珍重抵球琳

都昌李乘時秀峯

不信簿書役能抽著作身風塵磨雅吏山水鑄才人  
集腋裘無縫驚心筆有神添鐙忘讀久窗外雪如銀  
老坡工說鬼諸子善談天獨節怪奇事兼留文字緣  
名言見經濟野史信流傳無限千秋想窮年手一編  
披覽千餘卷包羅萬有才案頭成集後海角寄書來  
別思江城柳吟魂庾嶺梅迢遙煩索句翹首重低徊  
曠世誰知己平生此弟昆虛名羞我負舊句感君存  
遙識焚香選何當對酒論祖鞭羨先著詩卷在乾坤

長汀胡 鑒衡齋

天末懷人感慨多前聞軼事重搜羅論交湖海知心  
渺憶舊星霜轉瞬過君自名場雄意氣我從宦海悔  
蹉跎平生亦有離羣感退筆無靈可奈何

江陰繆祐孫幼丞

紛綸載筆闢經史絕勝桂海註魚蟲四朝聞見足承  
邵五編續纂能方洪

一官一集定堪紀萬本萬遍亦奚辭如此題詩非浪

許要慙皇甫稱左思

栗香隨筆卷一

江陰 金武祥 蒞生

余家居大岸爲江陰縣之西隄水木清華溪流曲抱  
柳堤荷蕩野趣尤饒 五世祖絅軒先生以宿學者

儒教授鄉里遠近來學羔鴈成羣程文恭公聘三相

國

景伊

及弟命三學博

景傳

以弱齡遭家難先生令

其來學飲食教誨十餘年故師門之誼尤篤後命三  
學博有春日至大岸謁金絅軒先生詩云蠟屐相將

叩曉扇鶴裘鹿鬚仰儀型春風門巷花能白晴日溪  
橋柳欲青栗里衣冠重捧席草堂燈火舊橫經深宵  
密語情何限指點蘭芽滿室馨有偕來者遺其名亦  
和韻呈詩云柴桑村畔欵巖扃玉樹蘭芽滿戶庭里  
社笙歌娛樂歲親朋羔酒祝遐齡春風欲透梅梢白  
暖日纔烘麥隴青課雨問晴真賞在地行仙卽老人  
星就一詩誦之覺情景兼深風流尙不遠也

文恭公旣負笈來學

綱軒先生極器賞以女妻之



與 高祖志達先生 高叔祖行達先生爲異姓昆  
仲以道義文字相切磋往來詩詞至今僅有存者寄  
金志達內兄詩云皖國江山控上流客行到日及清  
秋風塵誰辨干將劍書記空隨博望舟壯志十年慙  
入幕鄉心千里怯登樓等爲人子輸君樂早著萊衣  
罷遠游又和金行達內弟原韻寄贈云南鴈飛從水  
一涯銜將芳訊到京華天倫樂事三春草人世浮名  
十里花雷雨須時終躍浪風雲計日候乘槎少游鄉

思非君意莫歎長羈下澤車飛騰暮景去如奔下直  
蕭然靜掩門老我髮絲虛弱息輸君湯餅弄文孫高  
堂矍鑠人歡慶煖閣團圓日晏溫顧影自憐成底事  
還如蕉鹿夢山村

程文恭公薨於位 上賜聯云執笏無慙真宰相蓋  
棺還是老書生可謂備極哀榮王蘭泉司寇蒲褐山  
房詩話云公贍於詞章兼精吏牘初不以道學名而  
濂洛五子之教素所服膺故肫誠樸實頗知大體有

雲塘詩鈔亂後不存前所載贈 先高祖詩乃於江  
都符南樵所刊 國朝詩雅正集內錄之贈 先高  
叔祖詩乃於繆幼岑所藏其曾祖申甫太史手抄本  
內錄之

趙甌北觀察詩集有壽金丈志達八十詩云耆英遐  
福日初昇解組仍欣 紫誥膺家慶及身看四代儒  
餐每飯尙三升品高鄉社迎車拜詩就兒孫蘸筆騰  
養老卽今脩盛舉蒲輪會見璽書徵又題金玠堂明

經客窓偶筆詩云稗乘紛紛各逞才壞人心合付秦  
灰多君巧用齊諧體演出儒家語錄來史才獨擅苦  
無施聊撫新聞小試爲毛穎陶泓原有例古文手筆  
作傳奇不炫新奇不撮空採來都在見聞中笑他司  
馬相如賦烏有先生無是公老藉叢書引睡魔此編  
猶未廣搜羅鄙人賣菜還求益要看容齋五筆多及  
曾祖玠堂先生二筆成觀察爲序而評之謂可作  
古文讀今序已亡去每篇末評語猶存又外甥金皋

京闈發解喜賦云喜聽星郵報賢書捷鹿鳴恰成吾  
宅相早決汝科名辛苦三條燭飛騰萬里程渭陽推  
自出亦覺有餘榮鄉科年似我發解亦京闈敢詡傳  
衣付須乘破竹機遠書烏鵲喜暖浪鯉魚飛一第應  
連綴期登鰲頂歸蓋觀察爲程文恭公壻余從伯枚  
偶先生爲其外甥又爲其孫壻累世姻婭而文字之  
契尤深云

余家與申港繆氏數百年來如朱陳秦晉代有連姻

申甫太守晉爲 五世祖絅軒先生外孫與 曾祖  
玠堂先生爲中表兄弟自幼最相契有寄懷玠堂表  
弟詩云芝艸蘭枝氣味同少年才藻倍稱雄士衡應  
擬誇文賦何日鞭絲入洛中別君猶記怕登車離緒  
隨風未忍書此夜客窗酬夙韻不知吟興近何如後  
屢疊前韻客窗筆記載之其裔久宦于蜀同治間余  
客西江其曾孫幼岑表弟亦自蜀至勤學能文過從  
甚密嗣余留滯白門幼岑寄懷詩云曾攜春酒從君

飲去歲韶光未老時不覺東風今又到那堪舊雨繁  
相思尊前懷抱向誰盡別後詩篇應我遺聞住六朝  
金粉地遙知風月阻歸期今幼岑亦挈眷僑寓秦淮  
久不得其消息道里遼遠山川阻深殊有天末涼風  
之感

繆小山太史

荃孫

於庚申年自申港避亂入蜀由寄

籍應鄉試中式改歸原籍成進士入詞館己卯晤于  
都中出示其著述甚富故余雜憶鄉居詩有一絕云

東鄰甲浦舊姻連著述今看後起賢握手燕臺各情話離鄉猶記廿年前

孫淵如觀察

星衍

太夫人金氏爲

先曾祖玠堂先

生堂姊觀察宦山左延

先曾祖于兗州官署客窗

筆記卽在其署內所成也觀察誼重外家與先曾

祖及先祖父往來詩文甚夥余幼時猶見盈帙亂

後悉燬今治城遺集祇載其題金月湄舅氏解鈴圖

云短衣長鋏碧山隅手弄金鈴捋虎鬚自繫不妨還



自解日中原未有於菟詩豪酒俠見天真翻笑城南  
射虎人我愧巡方無善政披圖空想獸能馴

旅人乍歸咏詩情景最妙 家君幼時隨 先祖自

袁浦歸有句云半天雲氣幸非雨兩岸鄉音知到家

爲 先祖所賞 武祥 辛巳年轉餉赴鄂順道歸省於

元宵前一日抵家有句云歸從嶺外書偏富笑指梅

梢月正圓亦爲 家君所賞

詩押歸字多暢遂之意有時亦不盡然余于甲子旋

里有句云里門食宿渾無定亂後還家不當歸又于  
巳卯秋由粵轉餉人都在上海候輪船有句云不堪  
蒹葭秋風裡行到江南未是歸兩押歸字又不覺悵  
然矣

番禺馮子良先生詢爲先祖己卯同歲生以名進

士作宰江西後遷知府守南康郡晚年引退常主講  
席刊有子良詩存數十卷曾文正公以詩伯稱之己  
巳年與余同爲吉州太守勦校試卷時先生年最老

余年最少唱酬無虛日贈詩有漢朝宰相千秋第吳  
會英才一輩人檄艸愈風名士業墨花飛雨少年春  
之句後返章門猶時時過從不數年聞已歸道山老  
輩遺微殊堪愴憶也

嶺南詩派自三家後自當以張南山太守爲一大家  
子良先生卽太守高弟也老輩中僅存者爲陳年丈

蘭甫京卿

禮

丙子余至嶺南爲書屏扇卽錄近作中

秋五古二首余和韻贈詩並贈以近刊先集京卿以

所著四種酬之並答詩云老去自寬未才盡兩年中  
秋成兩詩天籟偶然發南郭知音不意來鍾期世傳  
儒雅有家集我得拜嘉還什襲生平亦有論癡符蠹  
簡而今轉枯澀註云近日脩改拙著東塾讀書記未  
成蓋京卿經學最深晚年詩不多作也

詩有率然成之而爲人所稱賞者余與子良先生及  
同人游青原山各賦詩余勉成一首中有句云流水  
亦知宗派別名山未許俗人來子良先生極稱之命

寺僧刻壁間後同鄉何廉昉太守秋爲余刪定詩稿

評此詩云僕有游青原山記並六詩意謂不負此山  
不意先生復得此佳句殆亦所謂不虞之譽耶

游青原山歸途余用昌黎謁衡嶽廟題門樓原韻成  
七古一章子良先生以爲不如七律十四字姑錄于  
此以見少許之勝多許焉詩云牽纏踪跡勞天公十  
年走逐塵埃中一朝行樂頗自喜詩壇酒社心先雄  
好游不覺更成癖有極必造源必窮青原自昔擅名

勝遙遙七祖開宗風泉聲到耳逕彌曲細澗中斷

橋通古柏崛強鉢龍起崖枯石瘦空山空嶺雲團絮

日卓午小春天氣何融融先生杖履仙吏舄歡喜合

證獅王宮摩挲碣石辨唐宋風雨剝蝕苔花紅覃溪

學士精攷古禮關奇字乃折衷顏魯公隸書禮關兩  
大字禮卽祖字學士

考辨山中老僧了無事迎門合十頻鞠躬藥樹堂前

論忠孝英雄仙佛將毋同明季方公密之名以智披  
緇後住持于此建藥樹堂

荊花再開師再至我聞生滅環初終祖師圓寂時倒  
插荊樹于庭日

此花再開  
吾當再至  
興亡飽閱  
彌勒笑  
厯劫不壞  
誇神功  
登高  
憑眺  
興未已  
蒼烟紫霧  
紛濛濛  
歸來夜色  
淨如水  
片月飛上  
遙岑東

予與趙一臣大令游南城麻姑山卽麻姑會方平譚  
滄海桑田處也各賦七古一章余句有我來憑眺經  
千年水淺蓬萊復幾許一臣最愛之然其詩則云神  
仙狡獪了不喜靈境自足開心胸蓋不用舊說而通  
首開合動盪自令望而却步一臣名惟熙四川宜賓

人辛酉拔貢後補上高令

一臣出示其詩稿白帝城吊昭烈帝云隆準兒孫本  
出羣朝端爭識左將軍不將魚水同諸葛肯以英雄  
讓使君龍鳳果然歸一主江山從此定三分翠華已  
去秋江冷宮殿荒涼對暮雲潼關云凌空萬雉鬱嵯  
峨月落鷄鳴策馬過山勢西奔朝太華江流東注入  
黃河饑烏匝地人行少落日荒村鬼嘯多天府金湯  
三輔盛須知守險仗人和



外舅黃素菴先生

曾慰

作令安徽補繁昌調貴池被

議再起改發江西壬戌權會昌縣余往贅焉先生作  
令嚴明而性強直不諧于俗所爲詩跌宕可喜對月  
云何事關山月追隨幾十年詎因人有缺纔羨爾常  
圓搔首羞相問前身認未全幸游明鏡裡清白尙依  
然滕王閣用心餘先生韻云不入閭公座焉知王子  
才片帆天外去一序閣中來文運闕神力浮名等劫  
灰盛筵今又再知復爲誰開又云閣中無帝子座上

有天才序足傳于古人胡不再來七言如大雨云風  
聲雨聲天上來頃刻倒瀉江河開荒州云離離古戍  
黃無際愁煞江天一夜霜觀瀑云倒懸絕壁千條雪  
直瀉寒江萬古秋咏菊云可笑闌珊皆傲骨不嫌冷  
落幾知音贈蕭濬川方伯云白髮身猶先士卒黃鬚  
名不愧將軍贈漁亭云每憐知己無多輩却有忘年  
最少人

外姑沈太宜人名珂字雲浦品蓮方伯之胞姑母也

有醉月軒詩詞在會昌時咏雪裡桃花詩云本是瑤  
池天上種無端輕薄被人猜從今一洗千秋恨也抱  
冰心傲雪開數株映雪影橫斜襯出嫣紅綠葉遮畫  
譜翻新刪舊稿歲寒圖裡寫桃花又工繪事常畫梅  
花團扇並題雨中花詞云風雨連宵窗外驟也不管  
綠肥紅瘦飛絮簾櫳落花庭院都是消魂候細吮霜  
毫心暗搆倩冰紈將春留逗寫出孤標摹成傲骨春  
色還依舊內子名馥字幼芳素秉母教亦好爲韻語

幼賦隔牆花有分得鄰家一半春之句爲沈太宜人  
所賞後余館建昌內子偕往時郡齋明敝亦習繪事  
凡窗紙壁幃大率內子畫梅余題小詩有句云一幅  
梅花一首詩內子和韻云儂寫梅花郎詠詩惜不永  
年而卒偶檢遺稿爲之泫然

會昌古名湘江余與施立之司馬

建治

蔣醉園孝廉

萼有湘江探梅聯句詩云夙有貪花癖尋梅指水濱  
正逢開一樹不速到三人老幹初霏雪歸途共帶春

幾枝分贈去好與結芳鄰時贛州守及前任各大令

均奉檄來縣勾當公事和詩成帙余與袁君竹一序

之將付梓而未果其佳句如叢瀛石太守

占鰲

云有

花皆索笑無客不逢春吳樵孫大令

朝宗

云古香成

益友佳句出高人俞芝田大令

敦培

云天寒應見鶴

山古寂無人沈燮堂大令

國藩

云凍凝雙屐滑香壓

一肩春陳支軒學博

良棟

云招雲心兩地邀月友三

人袁竹一上舍

康

獨和四首其二云忽憶梅花屋我

家東海濱叩門無熟客掃徑接幽人劫火燒不死孤  
根應復春何當掉頭去歸與締芳鄰尤覺灑落可喜  
沈太宜人亦和云韻寫探花客香分咏雪人內子亦  
和云前身是知己雅韻最宜人又云綺窗花已著不  
待訪江濱故瀛石太守有娘子軍偏出岳家青絲步  
幃咏梅花之句閨媛和詩佳者如燮堂夫人毛荔賓  
女史云瘦到生花筆香分咏絮人醉園夫人儲筱鳳  
女史云何遜歸來矣吟梅話舊鄰又蔣靜宜女史云

薄暝烟中態奇溫雪裡春新詩傳咏絮珍重謝家鄰  
吳稚芬女史云皎潔塵無染馨香雪有春姮娥堪作  
友願結廣寒鄰蔣爲醉園孝廉之妹吳爲樵孫大令  
淑媛皆與內子閨中契友也

涇縣吳樵孫先生

朝宗

作令江右有循吏風爲沈文

肅公撫江右時所特保余至會昌外舅署時先生爲  
前令尹因案逗留一見引爲忘年交獎許過當惠詩  
有德輿佳婿人爭羨蘇頌雄師世共知讀到詞章情

更慙交從文字樂無涯之句余兩經廬陵先生宰是  
邑皆款留甚摯戊辰春勦校吉安郡試適聞先生回  
籍後卽歸道山余寄詩輓之云薤露俄傳淚暗吞茫  
茫天道竟難論當年治行曾稱最此地蒼生尙感恩  
猶幸暮年歸志遂誰于薄俗古風存科名累世多陰  
德曾見重興駟馬門幾度螺川繫客船孟公投轄每  
拳拳重來又認飛鴻迹一慟驚聞化鶴年遠道何時  
陳絮酒高山此後息琴弦不堪蹭蹬風塵日哭到知



音倍黯然

吳福侯太史名維藩原名之禧樵孫先生從姪也癸亥年薄遊江右與余詩函往來各極傾慕惠書有借耀于被繡之幘力挽夫退飛之鷁等語其抑塞磊落概可想見癸酉由含山學官試白門遂重晤于秦淮河畔是科君卽獲售庚辰成進士入詞館涇川吳氏世居茂林村聞其族姓繁衍科第蟬聯素爲皖南望族云

醉園爲余外舅聘司記室好苦吟詩成則凝鍊跌宕  
無艱澁之態余贈詩云吟豪心挾千秋想世亂身輕  
萬里遊醉園留別詩云論才不覺心胸隘結契真同  
骨肉深碧艸春波江令賦高山流水伯牙琴可以想  
當日之交誼矣醉園弟扇芳名棻亦能詩

諸君介石名豫山陰人余外舅權會昌時度支友也  
曾出示舊作美人四尖詩眉尖云巧門彎環不礙顰  
眼波潤處更輕匀文君韻借纖纖影京兆情餘淡淡

春迨襯額黃偏娥媚斜侵髮翠越精神含愁近被雙  
峯壓却恐郎爲薄倖人舌尖云鶯簧嬌囀坐生春慣  
把機鋒巧刺人琥珀杯濃濡竹葉櫻桃夢綻剝瓜仁  
鸞膠戲續輕粘嚙鳳笛頻吹略潤唇猶愛夜來燈下  
事翻書故故印芳津指尖云黃玉纖纖啟鏡臺春蒸  
露出甲皚皚書生狂想宜搔背韻語頻敲偶托腮燈  
畔含情羞弄帶筵前撩興笑移杯有時拈得雙紅豆  
贈與相思著意裁鞋尖云三寸蓮勾暖玉雕略餘鳳

嘴視雙翹宛然洛浦凌波態可勝齊宮貼地嬌花片  
蹴殘微有迹苔痕點碎太無聊料他一縷芳心動應  
把檀郎雨意挑細膩熨貼置之疑雨集中無以辨也  
昆明錢璞舍上舍瑜客遊西江最久余耳其名而未  
之見也由瀛石太守處見其雪舟集亦可嘗鼎一臠  
矣寄內云有書頻寄我每飯不忘君別夢還家少空  
囊行路難近狀云兒女累人皆樂事僮奴換主爲貧  
家贈吉安何廉昉太守云愛吟水部新詩本來訪文

山舊艸堂其古風多豪宕之氣憶昔結句云天如壺  
地如爐盛氣所向皆坦途壓裝不惜黃金盡半贈妖  
姬半酒徒

幕客知名者蘄州吳展其明經之驥會與晤于章門

出示峽中雜詩蓋其所愜意之作也詩云灘平利在  
帆灘陡利在緯辛苦上水船萬蟻背一線拌以千鈞  
力爭此尺寸漩人聲叫未絕轉枕頭欲眩杯盤如走  
丸蓬頂雪浪濺一縱乃不測呼吸付奔電入世憂患

多出鄉身命賤不見下灘舟勢疾離弦箭江從何處  
來日與人爲難匹練飛白龍一道挂天半波搖蜀戶  
開力撼楚山斷還從九地底伏以白石爛橫亘巨鰲  
脊蹴起浪花燦舟行偶不慎人鮮一獲爨吾將訴真  
宰陰陽借爐炭盡泐磯石頑復占風水換幾轉近青  
灘一壁峭難削懸崖三石芝疑是仙人藥誰歟呼馬  
肺欲洗此名惡癡想猿猱攀歟忽風浪作鼓浪不可  
前力窮生錯愕難回天地慳况敢混沌鑿掉頭喚舟

子火急一篇著幾朵青芙蓉打頭恐吹落山高日易  
曠路迴心轉急荒涼數百里棧棹少城邑默數明日  
程目極峯巒集歲暮雨雪多撫景懷靡及西巖老漁  
父寒江一簑笠不愁簪簪空自足薪米給人忙彼自  
閑晚尋溪口入鷺鷥復何事盡日沙頭立青灘置津  
吏亂山擁鳴騶下臨蛟龍淵上有雙飛樓樓高接雲  
漢曠古神仙游靈旗颺天風飄落巖花幽可望不可  
卽翠鳥鳴啾啾俯視萬斛舟紛紛鳬鴈浮大地何蒼

茫我知僊亦愁同船日已夕夢繞青山頭嗟我墮紅  
塵何處尋丹邱兵書鬼神護寶劍霜雪皎何人之所  
留高出喬木杪欲訪風雨來咫尺隔縹緲同舟磊落  
人擲筆向天表發洩古靈秘游龍恣奇矯奮欲携詩  
往鼓掉去如鳥破浪志固豪臨淵戒應曉君欲學英  
雄此膽不可小君欲學聖賢此心不可少夜山圍幾  
重坐甌苦無奈一川水橫飛沸起成怒瀾初爲峽雨  
鳴漸鼓雷霆大更深益震蕩怖人毋乃太呼童急啟



窗披衣未及帶石氣撲燈青一峯立船外地多楚遺  
民古姓聚村落歸州萬山中自有一城郭城東屈子  
祠蘭茝香漠漠巴東接夔施萬劍插青嶠杜陵稷契  
身終將灑西托民安山水靜不解市廛樂東西邇多  
事此間未蕭索豈無經世才高隱臥雲壑恥作出山  
草負此救時藥欲賦招隱篇恐驚猿與鶴

天津張筱琴明經

桐

亦客西江最久性情肫摯閱歷

尤深好談詩娓娓不倦嘗出示其雙桂堂詩草五言

如積陰如久病得句勝加餐江湖新閱厯骨月小團  
圓風搖秋樹老山抱夕陽愁七言如歲月頻驚寒暖  
換雲山不厭往來看學雖未就難拋業生本無才敢  
怨貧書難盡讀從吾好詩暫全鈔待友評又示渭川  
姪云好向文章尋舊業莫將詩酒誤華年才能傲物  
尤須歛事到依人盡可憐詩如其人可徵學養又詠  
白鷄冠花云雄飛氣盡白頭中則又自寓其感慨矣  
客西江者歛縣朱意如布衣適豐于才而嗇于遇余

表弟王子雲孝廉與之最稔乙亥晤于章門見示其  
曼陀羅菴稿秋感云漂泊經年昧所因西風吹到客  
愁新空山落木遲公子秋水芳蘭寄美人遺世未能  
黃鵠舉論交尙有白鷗親蕭蕭短鬢成絲易不惜朝  
來攬鏡頻清明云客中今日易黃昏強撥愁懷對酒  
尊芳草天涯可憐綠不須風雨也銷魂郊行云鷄脚  
花開紅艷艷貓頭笋長綠纖纖無心行到春深處黃  
蝶紛紛撲帽簷

余所見西江詩人如邵陽胡雪香學博

克念

可稱能

手惟處境艱窘常以書畫自給其見贈詩已遺去僅  
錄其秋柳四首和漁洋山人韻云蕭條景物黯詩魂  
回首風流漫較論舊雨別來應有夢春烟銷去了無  
痕笛聲已換清商調舞態空憐白下門欲爲倪黃添  
畫本夕陽鴉點亂千村過客愁添兩鬢霜馬嘶猶憶  
碧鷄坊玉關迢遞驚寒柝金縷彫殘憶故箱幾度西  
風吹漢壘當年清影護隋王月明堤畔砧聲動敲亂

繁星水半塘翠樓窗外下簾衣涼雨枝頭葉亂飛好  
鳥不來歌韻歇秋光如此壯心違禪經悟後顛狂改  
思入愁邊音信稀觸目每增寥落感向時顰笑已全  
非郵亭驛路最堪憐不裊柔條到酒邊旅燕無情拋  
寂寞暮蟬何事付纏綿門殘眉黛過三月瘦損腰支  
未一年轉盼陽回春意早暗彈清汁淨含烟

都昌李秀峯學博

乘時

與余過從最久談詩甚愜有

妙香室詩稿獨酌亭觀雨云一山出一雲一雲幻一

峯峯峯復變化頃刻千百重隱約望五老乃在雲當中  
赤日燒其間炎氣蒸蒼穹雨勢久停蓄四山陰濛濛  
飛電劃絕頂萬山皆一紅迅雷落絕壁萬竅皆一空  
驟雨崩然來瞬息迷西東天籟集兩耳壅塞不得通  
濕霧互呼吸一咽寒心胸大風西南來亂掃雲蓬鬆  
雨腳截然斷一碧橫長虹依然見五老秀出青夫容  
游開先寺云萬樹擁孤寺客來蒼翠顛路腥知虎過  
潭黑訝龍眠峯勢欲離地瀑聲如在天回頭隔塵

世此地合參禪過采石磯云烽烟滿目戰爭愁不見  
當年太白樓兩岸青山空對影一天明月正當頭豪  
懷我欲槌黃鶴醒眼人誰看白鷗把酒此來何限恨  
秋風落葉夜颼颼秋夜泛舟云澄波如鏡遠涵山夜  
靜秋高萬景閒星月在天天在水小船載我坐中間  
沿江疏柳影高低歷遍長堤與短堤一路菱花香不  
斷扁舟夜到水村西又五古如廬山云水深反見淺  
游魚近不隔觸手試一捉搖動萬山色隘口山塞天

日色漏一線雲木交嵯峨滴翠落人面五律如燈影  
逼人靜雨聲添夜長家遙憑夢到客久美人歸晚雲  
歸樹黑初月出林紅贈郭友云瘦憐今日甚詩較去  
年工彈琴云深宵長獨坐曠世幾知音七律如白鹿  
書院云勝境每忘人坐久名山應悔我來遲感懷云  
骨月生還餘百劫親朋死別各千秋海中夜月云魚  
龍氣混高低島星月光搖上下天秋懷云無限相思  
秋共瘦不堪獨宿夜初長秋雨云梧桐疏點不成滴



蟋蟀亂聲相與喧秋晚云一鴈與雲還野渡萬鴉如  
雨入寒村秋色云人當日暮貪凭檻客在天涯怕看  
山

秀峰出示其同邑徐燮廷大令灼綠波草堂詩八卷

云燮廷工詩爲張南山太守高弟作宰西川屢任繁  
劇同治四年卒于家年四十有三又有花簾瑣語若  
千卷不識邇來有人爲之刊行否集中美不勝收錄  
其夜發欒城云衆星搖不定一月墮微茫河漢淡無

色關山空自長馬蹄喧古堠蛩語怨秋涼親舍知何  
在雲飛總斷腸采石登太白樓云一尊呼太白把酒  
我來遲明月仍千古仙風又幾時世更誰共醉公去  
竟無詩日夜江聲壯凭闌有所思曉出武侯坡云旅  
館無端夜雨懸又從清曉整吟鞭銅盤冷日磨山頂  
鍤板濃雲壓樹肩寒燠自防孤客況陰晴難料早秋  
天村農却有崇功意葛相祠邊一慨然西安曉發云  
鴈聲嘹唳度秦樓予亦驅車感北游殘夢尙飛千里

月淡雲如畫一天秋輪蹄宛轉磨人老泥爪依稀逐  
處留觸忤閑情歎行役曉風鈴語不勝愁重過潼關  
云不待鷄鳴早度關車聲鈴語翠微閒黃河一線來  
星海紫嶂千重擁華山胥吏不驕官稅薄干戈無用  
土兵閑自憐行李輕于葉祇與浮雲共往還由資中  
馳抵內江感賦云悼亡哭子淚纔乾又向巖疆守一  
官人果傷心空色相事多掣肘更艱難笳聲列雉符  
頻下燭影如龍劍自彈閒倚彭排發清嘯中天星斗

不勝寒無題云酒闌嬌情抱琵琶茉莉新堆兩鬢鴉  
消受香風在涼夜枕邊都是助情花醖波紅暈罷微  
歌髻雨鬟雲夢自多鴛帳月來窗未掩艷情瞞不過  
嫦娥道中見白蓮感賦云涼雲簇簇水泠泠一段幽  
香喚未醒忍憶花間人拜月素粧嬌倚水晶屏擬塞  
上凱歌云壁壘森嚴夜紀功大旗風捲舞蛇龍瓊廬  
痛飲燒椽燭一顆人頭酒一鍾繡鞍銀甲炫華裝絕  
色胡姬捧玉觴馬後笙歌馬前鼓將軍還是少年郎

五古如涼月一片秋侯我在山缺鳥啼虛谷鷹猿墮  
枯藤縛大星如凝眸瞰人光皎皎峽中云水石風雨  
雷掀騰不暇辨疑有萬鼓鉦朝夕此鏖戰幾幾百斛  
舟破浪走如箭篙工拌身命背曲手還顛七古如俠  
客云三更酒醉五更別長嘯一聲天欲裂蕭蕭風雪  
滿關河歸來笑舐仇人血華山大雨云冷雲塞口嚙  
勿及一時風聲雷聲雨聲使我雙耳聾西林寺云寺  
門半毀僧避兵怪松夾立釵股橫微風天半一鼓盪

往往頂上波濤聲又五律如昨夜夢中夢此行歸不  
歸秋意在黃葉野田生白雲雲附鳥歸樹雨追人下  
山寒風不相恕缺月苦來尋月色悄然至蟲聲如許  
忙聞笛云夜寒天似水聞笛不勝愁花影一簾月美  
人何處樓曉行云旅宿先鷄起秋寒共鴈分行裝一  
身雨歸夢萬重雲磁鐘驛云烟巒三輔北風雨二陵  
西暝色消鴉背秋聲健馬蹄巴東曉發云烟際數聲  
櫓未明鷄亂啼片帆巴峽外殘月楚天西送觀國姪

孫回里云十載飄零狀憑君一語傳不才當亂地多  
病況中年七律如五更月作可憐色一雨花如有病  
人巖鷹伏洞窺蛇出路鬼援枝報虎來無欲只宜安  
飲啄不才何敢計窮通狂掣繡旂寒賊膽醉揮金璣  
數人頭潼關云太華三峯拔地起黃河萬里自天來  
邯鄲曉發云哀樂感人回首易功名從古稱心難謁  
岳武穆廟云兵法到公成絕調天心從古忌全才秦  
淮云流水未消亡國恨落花都是美人魂蠡湖漁隱

圖云山色四圍波萬頃釣竿只占一絲秋七夕云神仙自會驂鸞鳳偏要人間鵲駕橋皆可傳也

涇縣潘鴻卿貳尹

文琳

需次江右畫蝶最有名嘗成

七律十六章以寄感憤蔣醉園及其弟扇芳各和三  
十首填篋迭奏五色陸離茲僅記其數聯醉園云但  
逢花處都能戀不到香殘肯便歸坐使古今成大夢  
可能天地有長春腹飽濃香真不負身耽艷福可能  
消鉛華並不關塗澤文采原非借羽毛扇芳云生來



便入繁華境飛去渾忘夢幻身自從花落同飄泊直  
待春來再化生始信繁華都是夢須知物類也多情  
陽湖孫又村茂才

遇清

洲如先生從弟也有擊鼓傳

花曲云花枝不放鼓不停草堂客聚多酒星檀枰亂  
撒若風雨酒香花氣盈春庭擊鼓花奴年十六窄袖  
蠻靴人似玉鼓送春聲繞玉壺花驄夜影搖紅燭電  
掣星流倏變更急槌冷點都有情霏霏香霧沾衣過  
隱隱蜩雷入耳驚四座無言鼓聲寂到手春風辭不

得大戶真如渤海寬深杯直似長鯨吸平生量不勝  
三蕉也爲豪情戀酒瓢耳畔淵淵鼓仍作始信陽春  
真有脚此時庭院月娟娟此夜風光倍可憐誰家酌  
月無醅醪何處逢春不管絃管絃十里揚州路綠酒  
紅燈不知數觴政誰能風雅兼良宵肯被繁華誤晝  
角無聲我尙留賴君今夜散牢愁幾朝便是傳柑節  
又折花枝當酒籌又偶檢敝裘感賦云曾衝風雪擲  
無毛買醉難償酒價高游子敢拋慈母線簍人不羨

大夫蒸風流鶴警從渠暖偃蹇鶉衣亦自豪  
槁項尙留寒骨在男兒何事受綈袍  
蒙茸飛捲朔風殘曝背寒嗟卒歲難  
別淚舊霑雙袖濕瘦腰新減幾圍寬  
囊空已待逢春典褐短還憑護曉寒  
翻羨還家蘇季子黑貂猶得覆歸鞍

吾常才媛近以左家姊妹爲最韻卿女史名錫嘉適  
華陽會吟村太守有冷吟仙館詩稿田家雜興云  
茆屋四五椽荒畦二三畝種秫亦種杭蒔花并蒔柳好

風入戶來清氣滿  
虛牖鳥雀下庭除  
飲啄互飛走白雲  
歸空山一杯長在手  
酒酣不盡意高歌  
落星斗征衣曲云  
秋風搖落蓮塘冷  
海棠艷艷泣紅綆  
莓苔青鎖不開門  
月波滿地欹梧影  
綺窗閒寂宵寒重  
金刀聲促愁如夢  
別來不慣繡鴛鴦  
絲絲壓遍金泥鳳  
停針不語暗自傷  
寒砧處處敲淒霜  
征衣欲寄不知處  
邊塞風高秋更涼  
秋夜聽雨偕吟村  
外子聯句云疏雨  
斷宵柝梧桐秋夜  
涼枕延歸夢短燈  
引旅愁長樹

濕鳥淒冷花寒蟲語香竹梢風過處清景似瀟湘又  
五言如黃葉滿庭秋草徑蒼烟濕松花和露落山鳥  
帶雲歸紅蘭嬌挹露碧筱淡浮烟七言如七分涼意  
三分病轉覺秋光此地多落葉云生機榮悴皆前定  
莫爲飄零恨朔風

吟村太守歿于太平軍次韻卿夫人扶柩歸葬自寫

孤舟回蜀圖吟村族弟佑卿太守

省三

題詩云蜀山

尖兀蜀江清江上秋風動素旌落日夔巫一回首哀

猿惟有斷腸聲莫道魂歸蜀道難危途履險得平安  
此中淒苦憑誰見一片蛾眉月影寒

閨媛工詩鮮有爲試帖者歸安查慕仙女史與余外  
姑沈太宜人相契從前見其詩稿一帙試帖居其半  
僅記其賦深巷明朝賣杏花云關心籌隔夜巷口賣  
明朝春意千枝開生香一擔挑好添蟬髮麗不襯馬  
蹄遙又云移來芳塢艷喚起玉樓嬌亦閨媛詩中一  
格也

河豚以江陰爲最美辛巳春初返里與陳子懷太守  
翔翰變卿申翰繆小山太史馮永之學博排日暢飲  
適河豚上市始獲飽飫記壬申春至江城夏永曦先  
生及子懷太守皆以河豚招飲病瘧不果往作詩解  
嘲蓋爾時余久客於外猶未知此味也詩云我舟抵  
暨陽雪霽媚晴旭君山如故人遠迎青一角繞郭有  
長江魚美本風俗將欲下陳榻又喜來夏屋兩君夙  
好客適逢春酒熟云有西施乳來飫東坡腹河魚以

豚名其肥且勝肉我昔嘗垂涎今擬恣所欲無端瘧  
鬼來似妬我口福我當以術驅更將杜詩讀人謂子  
胡然此疾幸相觸河豚當春初味厚每蘊毒土人飲  
江水食之化且速君今久離鄉水土恐未伏老饕若  
無饜中毒或罔覺江湖魴鯉多何必嗜茲獨瘧鬼比  
諍臣暫至不容逐我聞始釋然一任主人促凡病從  
口入斯言願三復永翁曾和韻作詩今老成凋謝和  
詩亦遺失不存矣



江陰東鄉有繖墩吳王第八子葬此墩半珊瑚洞卽  
墓穴也墩前後皆水名繖墩湖四旁梅花數千株登  
墩而望一白無際香聞數里有奇古而偃蹇者相傳  
爲明時所植余於甲戌春往遊成七古詩云江南十  
日春風顛三十三峯爭呈妍游心一發不可遏如馬  
縱轡箭脫弦平生名勝愛周厯家山咫尺甯舍旃譬  
猶珍錯鑿山海蘊鱸鄉味倍足憐舜過秦望日相對  
城東佳處尤情牽砂山定山二山缺繖墩突起高逾

拳兩獅對峙作毬戲雙龍挾走同珠圓上有古洞深  
復窈下有湖水清且漣不須弔古動感慨攬景自足  
供流連況有梅花萬千樹環山一白何綿延羅浮世  
界香雪海神迷骨醉疑登仙就中古梅作花祖鐵幹  
蟠屈生何年深林一入誤向背左挹右拍空盤旋惜  
哉林逋未見此只今艷羨西湖邊乃知名花與勝境  
附驥亦賴高人傳此花此境久閒寂我來一笑非偶  
然良遊旣踐山水約會當築屋林巒巔蒼松翠竹並

羅列結鄰三友應宿緣詩成更向老梅說可能脫去  
塵俗追前賢

余於辛未三月就舊基築室數楹成詩四律有云百  
劫尙留先澤在羣花應喜主人來謀深菽水經營早  
話到田園意味長剝啄有時驚犬吠游行隨處聽鶯  
啼覺處境寬閒有怡然自樂之象故自辛未以後詩  
編爲愛廬草弁以小序有云喜頻歲占豐有象比戶  
皆春看羣花含笑而迎主人無恙鯉庭雖遠歸養可

期鱗隰方開催耕自便兩三間于焉小築雲水能容  
數百里亦作近游風塵尙倦蓋紀其實也